



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 5. 2017

E MERKADO FINANSIERO

Ta di spera ku bo a kuminsá di kita e “kontribushon di 10% pa paga bo mes promé” ku mi a sugerí den e artíkulo anterior i ku bo ta basta konvensí tokante invertí den lugá di spar so, asta ku e riesgo adishonal. Ok, Si. Pues? Kiko awor? Kon bo ta sigui pa dilanti?

Pa kontesta bo preguntanan, nos mester sòru ku tur hende ta riba e mesun página ora nos ta papia tokante merkadonan finansiero òf kualke otro merkado ku bo por tende menshoná den media tokante invershonnan. Tambe laga nos kita e puntonan básiko for di kaminda ora ta trata e merkado di kapital di moda ku bo lo komprende di kon nos ta skohe pa zum en riba e tópiko spesífiko aki pa nos artíkulonnan benidero.

Nos lo kuminsá ku identifiká e propósito di kualke merkado. E ta un lugá kaminda kumpradónan i bendedónan ta bai pa hasi negoshi (kumpra i/òf bende) produktonan di kalidat na e mihó preisnan. Por ehèmpel, despues di un eksperensia di hasi kompra tremendo, bo ta sali e pakus, sintiendo manera bo a haña un bon preis pa e artíkulo ku bo a kumpra, pasobra esei ta e “preis di merkado” – pa e artíkulo ei – i di e kalidat ei. Bo sa esaki pasobra bo a tuma e tempu pa wak rònt i bo a mira ku e preis pa e produkto di kalidat ku bo ke ta zueif den un sierto kareda di preis. Tambe, bo ta konfia e merkado pasobra e ta transparente, hustu i efisiente; e kumpradónan i bendedónan konosé e reglanan i ta di akuerdo ku nan i ta kumpli ku nan. Por ehèmpel, ora bo bai un pakus di sapatu, e preis normalmente ta di meldu riba e sapatu, bo por puntra pa asistensia pa pas e sapatu pa wak si e ta pas i bo ta paga e preis indiká en kambio pa e sapatu. Eseinan ta e reglanan. Ta zona hustu i fásil, korekto?

Si nos apliká e senario di e merkado pa e sèn ku nos tin disponibel pa invertí, nos lo ta di akuerdo ku nos mester di un lugá ku lo permití nos di haña e “mihó produktonan” pa nos

sèn surplus. E mas mihó produkto den e kaso aki lo ta ganashinan fantástiko miéntras ku nos preis ta e nivel di nos sènnan di spar i nos appetit pa diferente nivel di riesgo. E ganashinan ta òf e tarifa di interes si bo ta papia di bono òf dividendo i kresementu di kapital si bo ta papia di akshonnan. Esei ta e puntonan básiko. Ganashinan por bira mas kompliká pero laga nos tene kos simpel pa awor aki.

Den e mundu di invershon, nos merkado ta e Merkado Finansiero. E ta un lugá, - no nesariamente un struktura físiko – unda kumpradónan i bendedónan ta topa pa kumpra i bende instrumentonan finansiero ku e meta pa mobilisá sèn di *prestamista*– individuonan (pa medio di nan sènnan di spar) i negoshinan (for di cashflow di mas) pa e *esnan ku ta fia sèn di hende* - individuonan (empresarionan), negoshinan (kompanianan ku ke ekspandé) i gobièrnu – kende mester di sèn pa propósitonan produktivo. E transakshon resien di emishon di bono di Building Depot ta un bon ehèmpel lokal di un tal transakshon di Merkado Finansiero.

Dentro di e Merkado Finansiero, nos tin un kantidat di merkadonan mas chikitu spesialisá - E Merkado di Divisa, e Merkado di Materia Prima, e Merkado di Instrumentonan Derivá e Merkado di Término, e Merkado di Kapital, e Merkado di Sèn – e lista ta sigui. Kada un di e merkadonan aki ta ofresé oportunidatnan pa ganashi segun un spectrum di riesgo variabel.

Di e merkadonan menshoná, e Merkado di Kapital i e Merkado di Sèn ta mas komun i ménos kompliká i ta sirbi komo e wesu di lomba di mayoria di Merkadonan Finansiero establesé. Un kantidat di hende ta usa e dos merkadonan aki interkambiabel, pero nan tin un diferensia primaria. Masha simpel, e Merkado di Sèn ta e sekshon di e Merkado Finansiero ku ta trata invershonnan ku ta madurá dentro di un aña – término kòrtiku – miéntras e Merkado di Kapital ta trata ku invershonnan di término largu. Ata! Nada kompliká. Manera bo por imaginabo, seguridatnan emití den e Merkado di Sèn lo tin rekompensanan mas abou ku e invershonnan di término largu ku ta tuma lugá den e Merkado di Kapital. Komo un invershonista, ta hopi lógiko ku bo lo ke wòrdu rekompensá ku ganashinan mas altu pa tuma riesgonan pa un término mas largu. Korekto?

Bo kuenta di spar i depósitonan simpel di término di 1 aña ta forma parti di e Merkado di Sèn – loke mi lo konsiderá sparmentu i no invertimentu – mienstras ku bono i akshonnan ta forma e Merkado di Kapital. Mirando nos meta prinsipal di kreashon di rikesa loke ta wòrdu derivá primariamente dor di e Merkado di Kapital, e artíkulonon lo trese bo mas altu riba e learning curve pa desaroyá bo komprendementu mas aleu di e oportunidatnan ku e merkado aki por ofresé.

Pensa riba esaki..... si e Merkado di Kapital ta transferí sènnan di spar inaktivo òf fondonan surplus den kanalnan produktivo di e ekonomia di término largu, esaki mester ta un win-win pa tur hende, asta pa e ekonomia pasobra e GDP (e balor di loke un ekonomia ta produsí) lo ekspandé dor di e benefisionan di e invershon produktivo. Di mes forma, e Merkado di Kapital ta un pre-rekisito esensial pa kresementu mas lihé di un ekonomia i normalmente ta forma e piedra di skina pa kresementu di hopi pais di Primera Mundu. Pues esaki ta unda mi ta kere bo mester kuminsá i pasobra e mayoria si no tur Merkado di Kapital

ta funshoná lo mas mihó dor di un Bolsa di Balor; den e próksimo publikashon nos lo koba mas profundo den komprendementu di e Merkado di Kapital en general, anto mas importante den e ròl di e bolsa di balor di Kòrsou, e “DCSX” en konekshon ku esaki.

“ Sèn ta un forma di poder. Pero loke ta mas poderoso ta edukashon finansiero. Sèn ta bai i bini, pero si bo tin e konosementu di kon sèn ta funshoná, bo ta gana poder riba dje i por kuminsá krea rikesa. E motibu di kon pensamentu positivo so no ta traha ta pasobra mayoria di hende a bai skol i nunca a siña kon sèn ta traha, pues nan ta gasta nan bida trahando pa sèn”

Robert Kiyosaki

E editorial aki ta wòrdu presentá na bo pa e DCSX ku kolaborashon di Vertex Investments.

Outor di skina di invershonista: Stephanie Shaw CFA, MBA.

